

O le Laumei Faitala

I se tasi o aso, a o savalivali ane ai laumei I se togāvaō tele. Sa ia fa’alogo ai ni leo o lo’o manumanuō mai I le isi itū o le togāvaō matua. Na ia tolotolo ma fa’alatalata atu iai, ona o le fia iloa po o ai e ona nei leo ua ta’aligoligoa ai le togāvaomatua. Ina ua latalata atu le laumei, na ia va’aia ai ni pato se lua o savalivali solo ma talatalanoa I lā la’ua tonu, e felelei I luga e matamata I le nu’u ua a’ave mai tala I le manaia I le va’ai. Na fa’ate’ia nei pato e lua ina ua fa’apea atu se leo, “o le ā lava le mea e te lua pisapisaō ai? Ua ta’aligoligoa le vaomatua I lua leo.” Na tali le pato muamua ma fa’apea atu, “O lea e fai le ma tonu, e alu se ma tafaoga e matamata I le nu’u. A ’o lenei e mafaufau po o le ā se faiga e fai a’I le ma tafaoga.” Na tūtū laumei ma mafaufau I se tonu manaia ina ia alu ai fo’I I le tafaoga a pato nei. E le’I uma lava, ae fa’apea atu loa laumei I nei pato, “Ae ā pe ’a fa’apea, o oulua o ni manu e malolosi tele. Fa’aaogā lua apa’au e felelei maualuga ane e matamata ai I le nu’u o lo’o a’ave mai tala e manaia I le va’ai pe ’a alu ane i luga o le va’alele. Ae avatu ai ma a’u.”

Na ’umi e le’I tali ane pato I le tala a laumei. Ua lē mautonu I mafaufau o pato nei, pe fa’apefea ona la felelei ma tau’ave laumei. Na manino I le manatu o laumei le mea o lo’o tau mafaufau ai pato, ona toe fa’apea atu lea, “Ou te iloa o lena e te lua mafaufau pe fa’apefea ona lua felelei ma ave a’u. Ae fa’apenei, e tofua oulua ma le pito la’au e ū I lua gutu. Ona ū lea e a’u le ogātotonu o le la’au, ona felelei lea o oulua I luga ma si’I le la’au fa’atasi ai ma a’u.” Na tau fai tepa pato I le isi ma fa’apea ane, “Oka..., ae ua lelei, o le ’a fai lena tonu.”

Ua sauni le la’au e laumei ma avane loa ia pato ina ia tofua I la’ua ma le itū. Na toe fa’apea ane le isi pato ia laumei. “Afai o le ’ā tatou felelei I luga ane o le nu’u, aua lava ne’I ’e tilotilo ane I lalo. Aua fo’I ne’I e ano I ni leo e te fa’alogo ai pe ’a malomaloā ane, ina ne’I le taunu’u ma le manuia le tatou tafaoga I le isi itū o le nu’u.” Na fa’apea ona talia e laumei le fautuaga ma sauni loa le latou tafaoga.

Ua amata ona ’apatā apa’au o pato, ma felelei aga’I I luga ma avatu ai ma laumei. Na mata’ina le matagofie o le amataga o le nu’u a ’o felelei ane I luga le tafaoga a pato ma laumei. Ua fa’asolosolo ’ina latalata ane I le ogātotonulemū o le nu’u. Ae fa’alogo ina loa e laumei le alalaga ane o tagata. “Oka, va’ai I pato o lo’o felelei ma tau’ave le laumei. Talofa e I nai pato, aiseā lava e tigaina ai e tau’ave le laumei, ae le felelei na ’o la’ua. Matua’I le alofa tele le la laumei I nai pato.” Ua valavala’au tagata I pato ina ia fa’amamulu le la’au se’I pa’ū ai laumei. Ua tigā tele le loto o laumei, ua galo ai le fautuaga a pato na fai ai ina ia aua lava ne’I amana’iaina ni leo pe ’ā fa’alogo ai. O le ita o lona loto I le vala’au a tagata, na matala ai lona gutu o le ’ā vala’au atu ai I tagata, ae pa’ū ane loa I lalo ma uma ai ma lona ola. Ua fa’anoanoa lava pato ina ua lē taunu’u ma le manuia le latou tafaoga ma laumei, ona o le lē usita’ia o le fautuaga sa fai ai, ae le’I alu le latou maimoaga I luga o le nu’u.

Tali fesili nei e fa'atatau I le tala. Fa'aaoga fuaiupu atoa e taliina ai nei fesili. (3pts ea.)

1. Aiseā ua fa'aulutalaina ai lenei tala, "O laumei faitala"?
2. O ai o lo'o fa'a-autūina ai lenei tala? E fa'apefea ona e iloa, o le manu lenā o lo'o fa'a-autūina ai lenei tala?
3. Afai e te suia se ulutala o lenei tala. O le ā se ulutala manaia e mafai ona toe fa'aulutalaina ai lenei tala?
4. Fa'amatala mai le fa'afitauli o tupu I totonu o lenei tala. Ona fa'amatalaina mai lea, po o le ā le fofō o lena fa'afitauli.
5. O le ā se a'oa'oga o fa'amatalaina mai e lenei tala.
6. Fa'amatalo ou lagona I le tala sa faitauina.